

lis Gnovis

■ **MONFALCON.** Cul gâs, no je tranzion ecologjiche

Il progjet di «AZA», ch'è pretindarès di brusà gâs naturâl te centrâl di Monfalcon, tal puest dal cjarbon che si bruse in zornade di vuê, nol è acetabil parcè che nol rapresente gran une tranzion ecologjiche vere, ch'è podarès stâ sù dome sul abandon totâl dal combustibil fossil. Sun chest pont a batin lis «Osservazioni» spedidî di «Legambiente» a Rome, dulà che si è daûr a fâ la «Valutazion dal impat ambiental» de ristrutturazion dal grant implant termoeletric de «Multiutility» lombarde. Tal document dai ambientalistis regjonâi e dal Teritori, si marche ançe i dams ch'al causionarès il metanodot necessari pal progjet, ch'al varès di traviersâ lis cuelinis dal Cjars, fiscant un teritori prezios e protezût dal Plan regjonâl dal paisaç.

■ **PORDENON.** Agriculture e inclusion

Al è saltât fûr l'ultin scandai su «L'Agriculture sociâl», par sclari trop che cheste forme d'imprese e rapresente «un'oportunitât pes campagnis talianis. Il document, ch'al pues jessi let tal lûc internet «Pianeta Psr» (www.pianetapsr.it/flex/cm/pages/ServeBLOB.php/L/IT/IDPagina/2534) al scrutine difusion, leçs e imprescj pal setôr. In Friûl e a Triest, dulà che la leç e met adun Agriculture sociâl e Fatoriis didatichis, tes notis uficiâls, a figurin 33 impresis, 4 cooperativis e altris 2 formis diferentis di realtâts. Tai ultins timps, al marche il scandai, si à tacât a meti in vore ançe te Agriculture sociâl i principis dal «Budget di salût», ch'al è un imprest par gjesti in forme inovative l'integrazion sociâl e sanitarie, cul fin di miorâ l'inclusion.

■ **PARÏS.** Leç storiche pes lenghis regjonâls

Ocitans, Catalans, Bretons, Cors, Bascs, Alsazians e Flamants, intune cun Creolis antilès e reunionès, Shimaoré, Polinesians, Canachis e Amerindians de Guiane, dai 8 di Avrîl, a varan imprescj gnûfs e plui potents par promovî lis sôs lenghis. A jerin 70 agns che il Parlament francès nol intervignive a pro des lenghis regjonâls e la maiorance ch'è votât il dissen di leç proponût par rinovâ chest setôr e je stade une vore grande, cun 247 «Si» e 76 «No». Tes scuclis publichis, l'insegnament bilengâl al podarà rivâ al 50% dal timp scolastic e al sarà plui facil inmaneà l'insegnament «imersif». Ancje lis regulis pes segnaletichis stradâls e pe scritture dai nons des personis a son une vore mioradis, cemût ch'al motive Jean François Mariot, tal numar 208 di «Nôvas d'Occitània».

■ **CJANIVE.** Musiche e fantasie

In plui di tornâ a inviâ lis sôs iniziativis musicâls, fermadis de emergjence sanitarie, il «Festival internazionâl di musiche sacrade» di Cjanive al propon une mostre speciâl. Li di vile Frova, fintremâ ai 20 di Jugn, si podarà rimirâ la rassegne «Esplorando la fantasia», cu lis ilustrazions dai ultins libris de artiste ongjarese implantade in Friûl, Sarolta Szulyovskij (pes prenotazions obligatoris: pec@centroculturapordenone.it). Fra i protagoniscj de esposizion, ançe la filandere Trosia Hilara, slave vivude in Aquilee vie pal prin secul prin di Crist e ch'è rivâ a sfrancjâsi de sclavitût paiant il so paron cu la jentrade dal so lavôr.

| | | | |
|-------------------|-----------------------|-------------------|-----------------------------|
| Miercus 19 | S. Ivo avocat | Domenie 23 | Lis Pentecostis |
| Joibe 20 | S. Bernardin di Siene | Lunis 24 | La Madone dal Jutori |
| Vinars 21 | S. Gjisele regjine | Martars 25 | La Madone di M. |
| Sabide 22 | S. Rite di Cassie | Il timp | Temperaduris cuasi estivis. |



Il soreli
Ai 19 al iève aes 5.30
e al va a mont aes 20.38.



La lune
Ai 19 Prin cuart.

Il proverbi
Il ciroc dulinziôs al fâs la plaie verminose.
Lis voris dal mès
Atenzion a tignî di voli lis bestiis
che a podarès vinuastâ lis plantis come pedoi,
cais e dorifarîs tal câs des patatis.

La petizion e domandave plui furlan tai programis radiotelevisîfs Rai par furlan: mil e 800 firmis metudis de bande

La gnove e je rivade tant che un folc cul cil seren. Si cjatile intun comunicât dal assessôr regjonâl Pierpaolo Roberti. In struc, il Guvier al à tomât a rinovâ par altris sis mès cence modifichis la Convenzion cu la Rai sul cont des lenghis mancûl pandudis. Si che, no an vût rispueste chês mil e 800 firmis tiradis sù mediant de petizion «Basta minoranze di serie B!», ch'è domandave une presince plui fuarte de lenghe furlane tes trasmissionis, pretendint il ricognossiment dai dirits de Comunitât furlane te programazion radiotelevisive de concessionarie dal servizi public. «La convenzion di cumò e discrimine la nestre Comunitât par vie des poçis oris di trasmissionis radiotelevisivis par furlan», al à protestât il prin firmatari de petizion, Diego Navarria, ch'al à stât sindic di Cjarlins e il prin president de Assemblee de Comunitât linguistiche furlane (Adif). «No si po acetâ: 30 oris ad an di television a son une cagnere – al à rionzût –, massime se si fâs un confront cu la programazion garantide par Comunitâts une vore plui picûlis di chê furlane, che te Regjon Friûl-V. J. e rive a 600 mil di lôr». Par Navarria, chest sprolunc decidût dal Guvier «al tibie i dirits costituzionâi e ce ch'al è stabilît par leç, biel che i puarte vòs regjonâi a palesin di no jessi in stât di difindi lis Comunitâts linguistiche dal Friûl». Parie cu la proteste, l'impromission di formis gnovis di lote: de raccolte di firmis, ch'è tire dilunc (<http://chng.it/zHPxhNBX>), a iniziativis programadis dal Comitât spontani nassût cu la partecipazion di clapis e di sociis. Parcè che «Par



Il prin firmatari de petizion, Diego Navarria, al impromet altris lotis par difindi te Rai il furlan

Il Guvier al à rinovât cence modifichis la Convenzion cu la Rai pes Comunitâts linguistiche

amôr dal gno popul, no tasarai», al bat Diego Navarria, rivoquant un sproc storic. Su la convenzion, rinovade cence modifichis, al è intervignût ançe il president de Assemblee de Comunitât linguistiche furlane, Markus Maurmair. «Chei ch'a rimetin a son simpri i citadins dal Friûl-V. J., massime chei ch'a fevelin par furlan. Cun dut ch'a pain il çjanul Rai, a scuegnin sopuartâ che i siei dirits, ricognossûts de Costituzion e des leçs statâl, no sedin garantîts. A di chest pont – al impromet il sindic di Voleson e di Darzin –, o scuegnin apelâsi ai sorestants. O clamaîr dongje un'assemblee urgente par stabili gnovis azions in mût di fâ sintî la nestre vòs fin Rome». Disdegnât pe suspension, Maurmair al domandave ch'a sedin sclaridîs lis resons dal sprolunc e dal fat che lis domandis de Comunitât furlane no son stadis scoltadis. «A la barbe dal

impegn di tantis fuarcis politichis e culturâls, cheste decision e lasse la bocje garbe. Salacor no vevin di iludisi di rivâ daurman a vincile. Ma cheste no je la fin dal nestri progjet, ma dome il prin pas intune lote che nus impegnarà tal avignî. Come Adif, o continuerà a batisi dapardut pe dignitât de lenghe furlane, in dite di ducj i 132 sindics ch'ò rapresentin».

Monika Pascolo

Messe par furlan

La Messe par furlan e ven cjantade ogni sabide a 5 e mieze sore sere (17.30), li de capele de «Puritât», daprûf dal domo. Sabide ai 22 di Mai al cjantarà messe pre' D. Volpe. Radio Spazio e trasmet sul moment la liturgjie.

Peraulis in dismentie par cure di Mario Martinis

❖ RANZIT

agg. = rancido
(dal latino rancidus "rancido, putrefatto, aspro, sgradevole", collegato a ranc re e rancus)
Al tocje tirâ vie il gras ranzit te bafe dal ardiel.
Bisogna togliere il grasso rancido dalla mezzina di lardo.

❖ RAP

s.m. = grappolo, più comunemente d'uva
(dal germanico krappa "uncino")
Cumò us puarti doi raps di ue mature.
Adesso vi porto due grappoli di uva matura.

❖ RASCJE

s.m. = grappoletto, racimolo d'uva, pare anche intendersi il grappolo con i rami e alcune foglie
(voce nata forse dall'incontro del verbo germanico raspon "raschiare" e dal latino rastrum, da radere)
Cjol un cinc rascjis di ue par fâ un rivueç di puartâ a cjase.
Prendi cinque grappoli per fare un serto da portare a casa.

❖ RASINT

agg. = rasente
(participio presente dal latino radere "radere, rasare; raschiare")
Cîr di no lâ vie rasint il mûr.
Cerca di non andare vie rasente il muro.

❖ RASULE

s.f. = spiaggia
(dal latino radere "radere, rasare; raschiare")
Anute e je lade bessole a cjaminâ su la rasule.
Anna è andata a camminare sola sulla spiaggia.

❖ RATI

s.m. = ramolaccio nero coltivato fino alla regione submontana, è servito in insalata; dicesi di persona stizzita e irata
(dal latino rotulus "rotolo" (per la forma rotonda))
Ursule e à fat la salse di rati par meti su la cjar lesse.
Ursula ha fatto la salsa di ramolaccio da mettere sulla carne lesse.